



**Discurso Gobernador  
Instalacion di Staten 2009  
Diahuebs 29 di oktober  
2009**

Pabien!

Boso a caba di bira miembro di e organo mas halto di Pais Aruba.

Esey ta un honor cu ta toca masha poco hende den nos comunidad.

Pa algun, e miembrecia di Parlamento kisas ta un premio di consuelo, pasobra boso tawatin e ambicion di bira minister. Pero lagami sigura boso; Parlamento ta e organo mas importante di gobernacion di nos pais, e nucleo di nos sistema democratico. Ta aki den hopi decision importante lo wordo tuma.

No laga ningun hende purba bende boso un dos a un cuatro.

E manera cu boso ta bay duna contenido na e tarea di representa e pueblo Arubiano, pa controla y aporta na realisacion di legislacion y regulacion, lo ta crucial pa futuro di Aruba y di nos pueblo.

Den mi posicion mi no tin mag di huzga e trabou di parlamento; sinembargo mi kier a gradici ambos partido di cua awe ta tuma despedida di nan for di parlamento, specialmente pa nan aporte positivo na e debate politico den e periodo di gobernacion tras di lomba. Tambe mi kier gradici nan pa e confiansa cu nan a pone den e medionan democratico na nan disposicion, pa inicia y pa influencia tumamento di decision.

Awe Aruba ta yama bonbini tambe na un partido nobo den parlamento. Partido Democracia Real.

A base di e ambicionnan cu a wordo publica, Aruba ta spera hopi di boso, no na ultimo luga pa loke ta trata legislacion inicial.

Durante transscurso di anjanan, varios biaha mi a haci un yamada pa hiba dialogo.

Awe un biaha mas mi kier a subraya e peticion aki.

Door di dialogo nos ta duna democracia dualistico contenido.

Pa tur gobierno, sigur ora e ta conta cu un mayoria absoluto, ta di vital importancia pa hiba dialogo den su

propio seno, cu oposicion y cu partidonan pafor di parlamento. Pa boso como miembronan di Parlamento ta di vital importancia pa hiba dialogo cu e hendenan cual boso ta representa.

Dialogo no solamente ta necesario na momento cu mester tuma desicionnan cuestionabel; dialogo mester tuma lugatur ora. E ta determina calidad di nos gobernacion.

Awe boso a bira parlamentario i nos ta spera cu lo duna dialogo e contenido cu nos tur ta anhela.

Dialogo ta caracteriza su mes pa respet mutuo; e ta caracteriza su mes pa curiosidad pa opinion di otro. Dialogo ta nifica cu nos ta discuti a base di argumentonan cu contenido cu ta conta na momento di tuma desicion. Y

finalmente semper na bienestar di e  
interes maximo, e interes nacional.

Door di hiba dialogo, ciudadanonan ta  
sinti cu nan ta representa den y door  
di parlamento.

Dialogo por pone cu ta realisa maneho,  
ley y reglamentonan minuciosamente.

Mi ta haci un apelacion riba boso pa  
hiba dialogo den e cas aki; akinan ta é  
lugar maximo di dialogo. Aki mester  
haci túr pregunta cu ta al caso: no na  
ultimo lugar asuntonan cu ta trata boso  
propio trabou. Ta beneficia interes  
general si discusionnan importante tuma  
lugar caminda esaki ta pertenece.

Entretanto boso tur sa cu Aruba ta para  
dilanti di temponan dificil.

E crisis mundial lo pone cu den e  
cuatro añanan nos dilanti, crecimiento  
economico lo mengua y finanzas publico  
lo cay bou di presion.

Ta tarea di gobierno pa ofrece  
solucionnan pa problemanan actual y  
esunnan den futuro.

E exito di gobierno entre otro lo  
depende di e grado cu cua e lo duna  
forma na e dualismo cu ta caracteriza  
nos regimen politico.

E exito di gobierno lo depende di e  
manera cu cua boso lo haci boso trabou.

Aruba a pone su speranza, su confiansa  
den boso man.

Mi ta desea boso tur hopi exito.